

ভোটার তালিকায় বিশেষ নিবিড় সংশোধনী SIR কাজের জন্যে চার হাজারের বেশি বুথ লেভেল আধিকারিক BLO নিয়োগে বিভিন্ন মহল থেকে অনিয়মের অভিযোগ ওঠায় নির্বাচন কমিশন জেলা নির্বাচনী আধিকারিকদের কাছে আরও একবার রিপোর্ট তলব করেছে। দক্ষিণ চব্বিশ পরগনা, পূর্ব মেদিনীপুর থেকে সবচেয়ে বেশি অভিযোগ আসায় সংশ্লিষ্ট জেলার জেলাশাসকদের কাছে ঘটনার তদন্ত করে আগামী সপ্তাহের মধ্যে বিস্তারিতভাবে এই রিপোর্ট জমা দেওয়ার নির্দেশ দেওয়া হয়েছে। এদিকে SIR এর জন্যে রাজ্যের তেইশটি জেলার মধ্যে সাতটি জেলার ম্যাপিং এর কাজ ইতিমধ্যে শেষ হয়েছে। ২০০২ সালের ভোটার তালিকা অনুযায়ী এখনও পর্যন্ত তিন কোটি ৪৮ লক্ষের কিছু বেশি ভোটারের নামের মিল পাওয়া গিয়েছে বলে জানা গিয়েছে। এরমধ্যে কালিম্পং এ সবচেয়ে বেশি ৬৫ দশমিক ২৭ শতাংশ ভোটারের নামে মিল পাওয়া গিয়েছে বলে সূত্রের খবর।

০০০০০০০০০০০০০০০০০০০০০০

রাত পোহালেই দীপাবলী ও কালীপূজো । আলোকমালায় সেজে উঠেছে গোটা রাজ্য। সুপ্রীম কোর্ট, কলকাতা হাইকোর্ট ও পরিবেশ দূষণ নিয়ন্ত্রণ পর্ষদের নির্দেশ মেনে নিষিদ্ধ শব্দবাজি যাতে কোনভাবেই পোড়ানো না হয়, রাজ্য সরকার সব জেলা প্রশাসনকে তা' সুনিশ্চিত করতে বলেছে। কালীপূজো ও দীপাবলিতে আগামীকাল রাত ৮ টা থেকে ১০টা এবং ২৮শে অক্টোবর ছটপুজোর দিন সন্ধ্যা ৬টা থেকে রাত ৮টা পর্যন্ত শুধুমাত্র পরিবেশ বান্ধব সবুজ বাজি পোড়ানো যাবে বলে জানিয়েছে কলকাতা পুলিশ। কালীপূজো ও দীপাবলিতে কলকাতা শহরজুড়ে বাড়ানো হয়েছে নিরাপত্তা ব্যবস্থা -

একটি প্রতিবেদন-

(ভয়েসকাস্ট - অভিরূপ)

আজ ভূত চতুর্দশী। গৃহস্থ বাড়িতে সন্ধ্যায় চোদ্দটি মাটির প্রদীপ জ্বালিয়ে পূর্ব পুরুষের উদ্দেশে শ্রদ্ধা জানানোর রীতি রয়েছে। চোদ্দ শাক খাওয়ারও

চল রয়েছে বাংলার ঘরে ঘরে। আগামীকাল অমাবস্যা তিথিতে দেবী শ্যামার আরাধনার আয়োজন করা হচ্ছে।

০০০০০০০০০০০০০০০০

ঠাকুর শ্রী রামকৃষ্ণ স্মৃতি বিজড়িত দক্ষিণেশ্বর ভবতারিণী মায়ের মন্দির, কালীঘাট মায়ের মন্দির, আদ্যা পীঠ, তারাপীঠ, হাওড়ার সিদ্ধেশ্বরী মায়ের মন্দির, নৈহাটি র বড় মায়ের মন্দির, উত্তর ২৪ পরগনার হালিশহরে সাধক কবি রামপ্রসাদের ভিটে তে আয়োজন করা হয়েছে কালীপূজোর। অনেক গৃহস্থের বাড়িতে এদিন কালীপূজোর রাতে ধন-সম্পদ এর অধিষ্ঠাত্রী দেবী লক্ষ্মীর পূজোরও আয়োজন করা হয়ে থাকে। অন্যান্য বারের মতো এবারও কলকাতা, বারাসত, মধ্যমগ্রাম, নৈহাটি, বারুইপুর সহ রাজ্যের বিভিন্ন স্থানে কালী পূজোতে মন্ডপে মন্ডপে নজর কাড়া থিম বৈচিত্র্য চোখে পড়ছে। কলকাতা, বারাসাত, মধ্যমগ্রাম, নৈহাটি, সহ রাজ্যের একাধিক জায়গায় নামি পূজো গুলোতে ইতিমধ্যেই ভিড় জমাতে শুরু করেছেন দর্শনার্থীরা।

০০০০০০০০০০০০০০০০

কালীপূজো উপলক্ষ্যে যাত্রীদের সুবিধার্থে পূর্ব রেলের শিয়ালদা ডিভিশন আগামীকাল, মঙ্গল ও বুধবার রাতে শহরতলীর বিভিন্ন শাখায় বিশেষ ট্রেন পরিষেবা দেবে। যেসব শাখায় রাত্রিকালীন এই বিশেষ পরিষেবা দেওয়া হবে সেগুলি হল শিয়ালদা - ডানকুনি, শিয়ালদা - বারাসাত, বনগাঁ - বারাসাত, শিয়ালদা - রানাঘাট, এবং শিয়ালদা - বারুইপুর।

০০০০০০০০০০০০০০০০০০

দর্শনার্থীদের সুবিধার্থে কলকাতা মেট্রো রেল আগামীকাল কালীপূজোর দিন রাতে ব্লু লাইন সেকশনে আপ ও ডাউন অভিমুখে বর্ধিত বিশেষ পরিষেবা দেবে। ওই দিন ব্লু লাইনে দক্ষিণেশ্বর থেকে শহীদ স্কুদিরামের শেষ পরিষেবা রাত ৯ টা ২৮ মিনিটের পরিবর্তে রাত দশটা ৫১মিনিটে এবং শহীদ স্কুদিরাম থেকে দক্ষিণেশ্বরের শেষ পরিষেবা রাত ৯ টা ৩৩ মিনিটের পরিবর্তে রাত ১১ টায়

পাওয়া যাবে। তবে ওই দিন ব্লু লাইনে মোট ২৭২ টি পরিষেবার পরিবর্তে সব মিলিয়ে ৭২ টি আপ ও ৭২ টি ডাউন সহ মোট ১৪৪ টি পরিষেবা দেওয়া হবে।

○○○○○○○○○○○○○○○○○○○○○○○○○○○○○○○○○○○○○○

কালীপুজোর উদ্বোধনে গিয়ে দক্ষিণ ২৪ পরগনার একাধিক জায়গায় আজ তৃণমূল কংগ্রেস কর্মী সমর্থকদের বিক্ষোভের মুখে পড়েছেন বিধানসভার বিরোধী দলনেতা শুভেন্দু অধিকারী। দক্ষিণ ২৪ পরগনার রায়দিঘি ঢোকার মুখে তাঁর গাড়ির সামনে বিক্ষোভ দেখিয়েছেন শাসক দলের মহিলা শাখার কর্মীরা। দেওয়া হয় গো ব্যাক শ্লোগান। পরে পাথরপ্রতিমা যাওয়ার পথেও আরেক দফা বিক্ষোভ দেখানো হয় তাঁকে। বিরোধী দলনেতার গাড়িতে চড় চাপড়ও মারা হয়।

পরে সাংবাদিকদের কাছে শুভেন্দু বাবু বলেন, ধর্মাচার পালনে এলেও তাঁকে বাধা দিয়েছে তৃনমূল কংগ্রেসের কর্মী সমর্থকরা। এর পেছনে অনুপ্রবেশকারীরা রয়েছে বলেও তাঁর অভিযোগ।

(বাইট - শুভেন্দু)

উল্লেখ্য রাজ্যের বিভিন্ন প্রান্তে লাগাতার বিজেপি নেতা কর্মীদের উপরে শাসকদলের হামলার অভিযোগ উঠছে। গতকাল উত্তরবঙ্গে প্রাকৃতিক দুর্যোগে বিপর্যস্ত এলাকা পরিদর্শনের পর ফেরার পথে সুখিয়া পোখরির কাছে দার্জিলিং এর বিজেপি সাংসদ রাজু বিস্তার কনভয়ে হামলার অভিযোগ ওঠে শাসকদল আশ্রিত দুষ্কৃতীদের বিরুদ্ধে। এই ঘটনায় এখনো কেউ গ্রেফতার না হওয়ায় আজ নিউ জলপাইগুড়ি থানার সামনে বিক্ষোভ দেখায় বিজেপির ওবিসি মোর্চা। রাজু বিস্তার কনভয়ে হামলার তীব্র সমালোচনা করেছেন বিরোধী দলনেতা শুভেন্দু অধিকারিও।

এর আগে গত ৬ই অক্টোবর জলপাইগুড়ির নাগরাকাটায় ত্রাণ বিলি করতে গিয়ে আক্রান্ত হন বিজেপি সাংসদ খগেন মূর্মু এবং বিধায়ক শঙ্কর ঘোষ।

00000000000000000000000000

বিরোধী দলনেতার ওপর হামলার তীব্র সমালোচনা করেছেন কেন্দ্রীয় প্রতিমন্ত্রী সুকান্ত মজুমদার। এক্স হ্যাণ্ডেলে তিনি বলেন, বিজেপি নেতা কর্মীদের ওপর বারবার শাসক দল আশ্রিত দুষ্কৃতিদের আক্রমণ শুধুমাত্র রাজনৈতিক অশান্তিই নয়, গণতন্ত্রের ওপর সরাসরি আঘাতও। বিজেপি-র রাজ্য সভাপতি শমিক ভট্টাচার্য, অভিযোগ করেছেন, তৃণমূল কংগ্রেস বাংলাকে সন্ত্রাসের রাজ্যে পরিণত করেছে। এখানে বিরোধী এবং হিন্দু কেউই নিরাপদ নয়।

০০০০০০০০০০০০০০০০০০০০০০

রাজ্যে বিরোধী দলের নেতা কর্মীদের উপর হামলা শাসকদলের সুপরিকল্পিত পদক্ষেপ বলে কংগ্রেস নেতা অধীর চৌধুরী অভিযোগ করেছেন। আজ এক সাংবাদিক বৈঠকে অধীরবাবু বলেন রাজ্যের অন্যান্য ইস্যু থেকে নজর ঘোরাতেই এরকম হামলা

বাইট

বেঙ্গালুরুতে কাজে গিয়ে, মুর্শিদাবাদের ৯ পরিযায়ী শ্রমিকের দেহ দ্রুত ফিরিয়ে আনার দাবি জানিয়েছেন, প্রবীণ কংগ্রেস নেতা অধীর রঞ্জন চৌধুরী। আজ পঞ্চপীরতলা এবং সংলগ্ন এলাকায় অগ্নিকাণ্ডে মৃত পরিযায়ী শ্রমিকদের পরিবারের সঙ্গে সাক্ষাৎ করেন তিনি। রাজ্য সরকারের ব্যর্থতার কারণেই এরা জ্যেব যুবকদের পরিযায়ী শ্রমিক হয়ে অন্যত্র যেতে হচ্ছে বলে অধীরবাবু অভিযোগ করেন। পাশাপাশি যেসব রাজ্যে পশ্চিমবঙ্গের পরিযায়ী শ্রমিক সংখ্যা বেশি সেখানে একজন করে সংযোগকারী অফিসার নিয়োগেরও দাবি জানিয়েছেন তিনি

০০০০০০০০০০০০০০০০০০০০০০

দেওচা পাচামি প্রকল্পের দ্বিতীয় পর্যায়ের ব্যাসল্ট উত্তোলনের কাজ শুরু হতে চলেছে। এজন্য পশ্চিমবঙ্গ পাওয়ার ডেভেলপমেন্ট কর্পোরেশন লিমিটেড নতুন সংস্থা নির্বাচনের প্রক্রিয়া শুরু করেছে। প্রথম পর্যায়ের মতনই ‘ওবাসাল্ট উত্তোলনের কাজ রাজস্ব ভাগাভাগি মডেল এ চলবে বলে জানানো হয়েছে। বর্তমানে

১২ একর জমিতে প্রথম পর্যায়ে বেসল্ট খনন চলছে। এখন পর্যন্ত প্রায় ২০ হাজার টন বেসল্ট উত্তোলন হয়েছে। দ্বিতীয় পর্যায়ে ৩১৪ দশমিক ৭৮ একর এলাকায় কাজ করবে নির্বাচিত সংস্থা। প্রথম পর্যায়ের চুক্তি শেষ হলে ওই ১২ একর জমিও যুক্ত হবে দ্বিতীয় পর্যায়ের সঙ্গে।

০০০০০০০০০০০০০০০০০০০০০০

পূর্ব বর্ধমানের গলসিতে শাসক দলের বিধায়কের উপস্থিতিতে টাকা ভাগাভাগির একটি ভিডিও প্রকাশ্যে আসায় চাঞ্চল্য ছড়িয়েছে। ভিডিওতে দেখা গেছে, গলসির এক নম্বর পঞ্চায়েত সমিতির সহকারী সভাপতি অনুপ চট্টোপাধ্যায়কে টাকার বান্ডিল বিধায়কের হাতে তুলে দিতে। সেখানে উপস্থিত আছেন পঞ্চায়েত সমিতির কৃষি কর্মাধ্যক্ষ পার্থ মন্ডল। সিসিটিভির ফুটেজের ওই অংশটি প্রকাশ্যে আসায় শাসক দলের তীব্র সমালোচনা করেছে বিজেপি। তৃণমূল কংগ্রেস সারা রাজ্যজুড়েই কাটমানির ভাগাভাগিতে লিপ্ত বলে তাদের অভিযোগ।

তৃণমূল কংগ্রেস কাটমানির অভিযোগ খারিজ করেছে। বকেয়া মেটানোর জন্যই ওই টাকা ভাগ করা হচ্ছিল বলে তাদের দাবি।

০০০০০০০০০০০০০০০০০০০০০০

৩৩ টি জীবন দায়ী ওষুধ এবং ক্যান্সার ও বিরল রোগের তিনটি গুরুত্বপূর্ণ ওষুধে জি এস টি এখন সম্পূর্ণরূপে মুকুব করা হয়েছে এবং অন্যান্য সব ধরনের ওষুধের ওপর জিএসটি ১২% থেকে কমে ৫% হয়েছে।। এর ফলে উপকৃত হয়েছেন সাধারণ মানুষ। সরকারের এই পদক্ষেপ কে ধন্যবাদ জানিয়ে হুগলির বাসিন্দা দেবলীনা চৌধুরী বলেন, এর ফলে সাধারণ মধ্যবিত্ত মানুষের মাসের খরচ অনেকটাই কমেছে।

(বাইট)

০০০০০০০০০০০০০০০০০০০০০০

বাতাসে জলীয় বাষ্পের পরিমাণ বৃদ্ধি এবং পশ্চিমী ঝঞ্ঝার কারণে আজও উপকূলের জেলাগুলিতে বিক্ষিপ্তভাবে হালকা বৃষ্টির সম্ভাবনা। তবে, রাজ্যজুড়ে শুষ্ক আবহাওয়া থাকবে বলেই জানিয়েছেন আলিপুর আবহাওয়া দপ্তরের বিজ্ঞানী ডঃ সৌরিশ বন্দ্যোপাধ্যায়।

আজ সকালে শহরে সর্বনিম্ন তাপমাত্রা রেকর্ড করা হয় ২৫ দশমিক ৭ ডিগ্রি সেলসিয়াস, স্বাভাবিকের থেকে যা ১ দশমিক ৫ ডিগ্রি বেশি।

০০০০০০০০০০০০০০০০০০০০০০

প্রধানমন্ত্রী নরেন্দ্র মোদী আগামী ২৬-শে অক্টোবর আকাশবাণীতে “মন-কি-বাত” অনুষ্ঠানে তাঁর চিন্তাভাবনা দেশ-বিদেশের মানুষের সঙ্গে ভাগ করে নেবেন। এটি হবে মন-কি-বাতের ১২৭-তম পর্ব।

বেলা ১১-টা থেকে আকাশবাণী এবং দূরদর্শনের সবকটি চ্যানেল এবং আকাশবাণীর নিউজ অন এ.আই.আর. ওয়েবসাইট, মোবাইল অ্যাপ, প্রধানমন্ত্রীর দফতর, তথ্য ও সম্প্রচার মন্ত্রকের ওয়েবসাইট ও ইউটিউব চ্যানেলেও “মন-কি-বাত” সম্প্রচারিত হবে।

০০০০০০০০০০০০০০০০০০০০০০

০০০০০০০০০০০০০০০০০০০০০০০০